

Purtrets dals quatter durmigliets indigenes

Ruiders cun tratgs da mieur e da stglat che fan in lung sien d'enviern

■ **Ils durmigliets èn ina famiglia entaifer l'urden dals ruiders ch'è derasada en l'Europa, l'Asia e l'Africa. Chatta.ch preschenta las características dals durmigliets e purtatescha las quatter spezias indigenas.** Durmigliets fan in lung sien d'enviern – a quai fa er allusiu il num da questa gruppa d'animals. Tar las spezias europeicas dura il sien d'enviern tut tenor spezia e regiun tranter l'october e l'avrigl, quai ch'expligtescha er il num tudestg dal durmigliet grisch: Siebenschläfer. Ma ils durmigliets na dorman betg be bundant la mesadad da l'onn – els èn ultra da quai activs per ordinari be da notg e sa trategnan uschi-glio en il zuppà. Els furman uschia mammals che vivan bain en u enturn il spazi da viver da l'uman, ma savens senza che quel als vesia u percorschia. Uschia sa lascha l'animalet savens fastizar be a moda indirecta, per exempel en furma da nitscholas morsas a moda specifica, ubain cur ch'el sa fa udir cun tschertgar l'atun en chasas e chamonas ina dimora per l'enviern.

En l'Europa Centrala vivan quatter spezias da durmigliets: Il pli grond dad els, il durmigliet grisch, cuntanscha la grondezza d'in ratun e viva en guauds e parcs en regiuns mesaunas e bassas. Il durmigliet giagl è in zic pli pitschen e viva en guauds da feglia e da guglias fin al cunfin dal guaud. La cua da questa spezia n'è betg sin l'entira lunghezza uschè pailusa sco tar las autras spezias. Anc in pauet pli pitschen ch'il durmigliet tirolais è il durmigliet grisch ch'è cumprovà en Svizra be en l'Engiadina Bassa. La quarta spezia da durmigliet indigena, il muscardin, n'è betg pli grond ch'ina mieur grisch e dat en egl pervi da sia color cotschen melnenta.



Tar ils durmigliets sa tracti da ruiders da grondezza pitschna fin mesauna. Lur pais tanscha da 15 fin 200 grams; il pail e lom, la cua per ordinari lunga e pailusa. Durmigliets sumeglian tut tenor spezia pli fitg mieurs ubain pli fitg stgilats. Sco las mieurs èn ils eglgs gronds e las ureglias pitschnas e radundas. La lunghezza dal chau e corp mesira 6–19 cm, la lunghezza da la cua 4–16 cm. Ina caratteristica è la cua lunga e pailusa; in'exceptziun furman las spezias ch'appartengnan a l'uschenumnada gruppa dals durmigliets da la cua da ratuns (en l'Europa: durmigliet giagl). Durmigliets vivan per gronda part sin plantas e chaglias. Tut tenor il spazi da viver fan els in sien d'enviern u – en regiuns chaudas – durant la stagiun sitga. La notg van ils durmigliets en tschertga da nutriment. En blers regards sumeglian els ils stgilats. Sco quels maglian els surtut nuschs, fritgs ed insects e magari er ovs d'utschels e pulschains. E tuttina sco ils stgilats disponan

el gugent en parcs e curtins da pumera. En tschertga da lieus d'envernada entra l'animalet l'atun gugent en chasas u chamonas.



Eglgs gronds e cua pailusa – las características dals durmigliets.

FOTO PD

ils durmigliets da griffas ch'èn adattadas per raiver e siglir per las plantas enturn. Durmigliets vivan ensemen en gruppas luccas senza in urden ierarchic fix. Ed els èn fidaivels al lieu, quai ch'als impedischa però betg da midar da temp en temp sin pitschen spazi lur piazza da gnivar.

Durmigliet grisch

Caracteristicas

Il durmigliet grisch è il pli grond represchentant da las quatter spezias da durmigliets indigenas. Quest rampignader excellent sa nutrescha surtut a moda vegetala, da fritgs e nuschs, per part però er d'insects ed auters invertebrats e, pli darar, dad ovs e pulschains d'utschels. Da l'october fin avrigl u schizunt il matg fa il durmigliet grisch in sien d'enviern.

Cumparsa

La coloraziun da l'animal fa tut en tut in'impresiuon grisch. Il dies è da color brin grisch e furma in cler contrast cun il venter grisch argientà; er la cua spessa è da color grisch. Ils eglgs èn gronds e marcants; enturn quels ha l'animalet in rintg stgir che rinforza anc quest'impresiuon. Dal durmigliet giagl e dal durmigliet tirolais sa distingua il durmigliet grisch tras la mancanza d'ina lunga sdrima naira che tanscha dal barbis fin tar l'egl.

Spazi da viver e derasaziun

Il durmigliet grisch è en general in abitant d'atezzas bassas e mesaunas (surtut tranter 600 e 1000 m). Singuls exemplars han ins però er gia scuvert en l'atezza. La spezia viva da preferenza en cuntradas cun chagliom. Per part viva il durmigliet grisch er en zonas abitadas; là sa trategna

Durmigliet giagl

Caracteristicas

Tar questa spezia sa tracti dal ruider indigen colorà il pli giagl. Cuntrari als auters durmigliets indigenes ch'èn savens da chattar sin plantas e chaglias, sa trategna il durmigliet giagl savens per terra. La spezia è surtut activa da notg. La sien d'enviern dura dal settember u october fin l'avrigl. L'animalet po però er crudar durant la stad en ina letargia da pliras uras fin trais dis e spargnar uschia energia.

Cumparsa

Pervi da sia coloraziun ritga da cuntrasts è il durmigliet giagl nunconfundibel. El posseda ina sdrima marcanta che tanscha sur ils eglgs fin tar las ureglias che stattan ora fitg ferm; ulteriuras características èn la cua, da la quala be il piz è cuvert cun in pail fitg spess, ed ils eglgs gronds. Il dies e las varts èn colorads brin grisch fin brin. Il venter è alv fin alv grisch.

Spazi da viver e derasaziun

Il durmigliet giagl viva surtut en ils guauds dal stgalim montan e subalpin. El preferescha guauds chauds, sitgs, cun gripa e pouca vegetaziun per terra. En l'entir Grischun è la spezia derasada vastamain dals funds da las vals fin en autezzas sur 2000 m. Bain pervi da la concorrenza cun il durmigliet grisch, il qual viva be pli a bass, para il durmigliet giagl d'esser pli frequent surtut sur 1000 m. Ils animals creschids vivan en gruppas da 5

fin 15 individis; perquai è sia repartiziun en il territori vaira irregulara: er en spazis da viver omogens datti lieus cun in'auta spessezza ed auters senza cumprovas. La spezia entra regularmain en aclas e tegias d'apl.

Durmigliet tirolais

Caracteristicas

Areguard sia coloraziun regorda il durmigliet tirolais plitost al durmigliet giagl, areguard sia grondezza e ses cumportament plitost al muscardin. Il durmigliet tirolais sa nutrescha en emprima lingia a moda vegetala, maglia per part però er arthropods. El viva surtut sin plantas ed en il chagliom. Ses sien d'enviern dura da l'october fin l'avrigl. Durant quest temp perda l'animal radund la mesadad da ses pais; quai para dad esser in factur da mortalitad pli aut ch'il privel da daventar l'unfrenda d'in animal da preda.

Cumparsa

Il durmigliet tirolais è per gronda part da color brin grisch. Sur ils eglgs tanscha ina sdrima naira davent dal barbis fin tar las ureglias ch'èn pitschnas e radundas. Il venter è colorà in pau pli cler ch'il dies, medemamain la vart sut da la cua en congal cun la vart sura. La cua è cuverta cun in pail fitg spess.

Spazi da viver e derasaziun

Il durmigliet tirolais viva en guauds maschadads e da guglias cun blera bostgaglia, savens en vischinanza da faus. Ins al chatta fin en autezzas da sur 2000 m. A l'ur da ses territori da derasaziun è l'animalet però fitg stgars. En Svizra è sia preschientscha sulettamain cumprovada en l'Engiadina Bassa (en plirs lieus en il con-

turn da Zernez). L'Engiadina furma il lieu da derasaziun situà il pli en il vest; l'ulteriura derasaziun da questa spezia tanscha sur l'Europa da l'Ost fin en l'Asia Centrala.

Muscardin

Caracteristicas

Il muscardin u mieur calanca sa trategna surtut sin plantas e chaglias. Be darar è la spezia da chattar per terra. L'animalet è in fitg bun rampignader e cuntanscha, pervi dal pais dal corp fitg pitschen, nutriment situà sin roma satiglia che n'è betg cuntanschibla per auters ruiders. Sper fritgs e sems sa nutrescha questa spezia er da flurs e brumbels. La stad vegnan er magliads insects ed auters invertebrats. Er il muscardin fa in sien d'enviern. Durant quel pon las sperditas muntar tranter 40 % e 70 % da la populaziun, quai ch'è bler dapli ch'il dumber d'animals che vegn tschiffà d'utschels da preda u da mustailids.

Cumparsa

Nagin auter ruider indigen na posseda la tipica coloraziun brin cotschna fin oranscha da la part sura dal corp dal muscardin. La vart sut è alv melnenta. La cua è munida cun in pail, il qual n'è però betg uschè spess sco quel dal durmigliet grisch u dal durmigliet tirolais. Il chau cun ils eglgs gronds e las ureglias curtas, ma bain visiblas, ha ina furma radunda.

Spazi da viver e derasaziun

Il spazi da viver tipic sa cumpona da chaglias e murers ed è per il pli situà a l'ur dal guaud. En il Grischun datti relativamain paucas observaziuns dal muscardin; quellas derivan dal Grischun dal Sid, da l'Engiadina Bassa, da la Val dal Rain e dal Scanveg. Probablmain è la spezia però pli derasada che quai ch'igl è enconuscent, e quai er en regiuns situadas pli ad aut. Cun agid da traplas da pail, montadas en in'atezza da ca. in meter sin plantas e chagliom, sa laschassan franc eruir anc ulteriurs lieus da derasaziun. In'otra pussaivladad per cumprovar il muscardin è da rimnar nitscholas ch'èn vegnidadas rusignadas a moda specifica.

Giasts betg envidads

Surtut l'atun entran durmigliets grischs ed en autezzas pli autas er durmigliets giagls en chasas e chamonas. Apparentamain mussan els quest cumportament surtut cura ch'els èn en tschertga d'in lieu d'envernada. Là pon els disturbar ils abitants tras lur canera u far donn cun magliar victualias e rusignar il mobigliar. Sch'ins vul sa liberar da tals giasts betg envidads, als pon ins tschiffar relativamain tgunsch cun ina da las traplas da giatter da fildarom usitadas. Ma alura tge far? Sco che quai è enconuscent tar auters ruiders pitschens (per exempel tar mieurs) returnan er durmigliets sur plirs kilometers enavos al lieu. Quest cumportament è ordvart remartgabel, pertge ch'els animals èn abels da chattar la via er tras in territori ch'als è dal tutfatg nunconuscent. Co ch'els s'orienteschan n'è fin oz betg scleri dal tut.

Sa cumprovada è en tutta cas la suandanta metoda per sa deliberar d'in durmigliet grisch u d'in durmigliet giagl: Laschar liber l'animalet en ina distanza d'almain 5 kilometers dal lieu nua ch'ins al ha tschiffà. Far quai da preferenza da l'autra vart d'in grond dutg u flum; quels furman per l'animalet in impediment natiral ch'el na po betg surmuntar senz'alter.



Il muscardin è il pli lev durmigliet indigen. Sia caratteristica è la color brin cotschna fin oranscha.

FOTO PD



Durmigliet grisch en tschertga da vivonda.

FOTO: CATHYUSER / PIXELIO

La preschentaziun:
Dossier «Durmigliets».

Dapli infurmaziuns:
chatta.ch/?hiid=1535
www.chatta.ch